

Sas jekh manus devlikano but; sas les duj sheja. Jekh dyes pala o kaver, thaj o manush kerdyas abav peske shejenge. E maj bara dyas la pala jekhe manusheske kaj kerelas pira phuvake, thaj e cina pala avreske, kaj bararelas luludya. Pala but dyesa, o manush gelas peske shejenca. Gelas kaj e bari shej pushlas latar hoj so maj kerel voj, sar si voj. E shej phendas leske hoj mishto silyi, numa ekh cerra xolyarikoj kaj chi pekel but thaj zurales o kham, te shukon le pira. Phendas voj le dadeske te rudyil pes kaj o Del te avel but thaj zuralo tato. O manush kothe gelas kaj e aver shej. Pushlas la sar e angluna sha. Voj phendas leske, hoj mishto si, numa chi perel o brishind, thaj lenge trubul brishind te baron lenge luludya. E shej phendas le dadeske te rudyil pes kaj o Del te del brishind. O chorro manush so te kerel akana? Anda soste te maj rudyil pes e Devlorreste? Butivar si kade le manusha, hoj chi zhanen so kamen, na zhanen so te keren! Thaj so te del o Devlorro kana o manush na zhanel sar te mangel les?

*(Kidipe kathar le kelderasha andar e Rumunia)*